



Convenio de colaboración entre a Axencia Galega de Desenvolvemento Rural, o Concello de Folgoso do Courel e a asociación “Agrupación de propietarios particulares Souto Rego da Brancha Moreda Concello Folgoso do Courel” sobre a execución dun proxecto de recuperación de soutos tradicionais no Concello de Folgoso do Courel para estender os resultados dese proxecto ao conxunto do territorio galego.

MEMORIA XUSTIFICATIVA

O director xeral da Axencia Galega de Desenvolvemento Rural

DECLARA:

1.- Que a Axencia Galega de Desenvolvemento Rural (Agader) ten previsto formalizar co Concello de Folgoso do Courel e coa asociación “Agrupación de propietarios particulares Souto Rego da Brancha Moreda Concello Folgoso do Courel” o instrumento convencional arriba referido por un período de vixencia de catro anos dende o día da súa sinatura.

2.- Que o instrumento convencional ten o seguinte obxecto: A extensión ao conxunto do territorio galego dos resultados da execución do “Proxecto de recuperación de soutos tradicionais no Concello de Folgoso do Courel” que está a desenvolver a Subdirección de Mobilidade de Terras da Agader.

Este proxecto enmárcase nun conxunto de Proxectos de Mobilización de Terras Agrarias en situación de abandono que está a desenvolver a Agader, con carácter experimental, a través do Banco de Terras de Galicia, como son a recuperación de terreos abandonados para pasteiros en Sober e a recuperación de terreos abandonados para a produción de pementos en Arnoia.

Todos eses proxectos teñen como obxectivo xeral obter datos estatísticos, agronómicos, comerciais, económicos ou de calquera outro tipo que podan servir para a extensión deses





proxectos ao conxunto do territorio, xa en forma regrada, unha vez levados a cabo os proxectos en diferentes sectores produtivos e áreas xeográficas.

O obxectivo do proxecto a que se refire este convenio, igual que o dos demais sinalados no parágrafo anterior, é mellorar o coñecemento da problemática da loita para a mobilización e contra o abandono de terras agrarias en Galicia, así como da situación dos mercados de terras agrarias en Galicia, e en particular:

- a) Coñecer e caracterizar os custes unitarios das actuacións de recuperación, tanto aquelas que teñen que ver coa execución de obras (mellora de accesos, roza e limpeza, actuacións de carácter agronómico...) como, sobre todo, as de natureza inmaterial, como pode ser o derivado das actuacións de dinamización, mediación e acordo entre partes, deseño dos modelos de negocio xurídico a emprender, xestión económica posterior...
- b) Definir unha metodoloxía de traballo cara a selección de zonas de actuación en base a parámetros obxectivos, así como unha serie de recomendacións para a súa mobilización produtiva de acordo cos parámetros analizados e oportunidades e obstáculos identificados e crear unha infraestrutura de difusión web da información xerada sobre mobilidade e mercados de terras para favorecer o seu dinamismo.

Eses Proxectos de Mobilización de Terras Agrarias en situación de abandono abórdanse baixo una dobre consideración:

- a) A necesidade de dispoñer dun *corpus* de coñecemento experimental e científico –e, xa que logo, inmaterial- que permita estender, unha vez concluídos os proxectos, as actuacións de mobilización de terras agrarias en abandono ao conxunto dos sectores agrarios produtivos e ao conxunto do territorio.
- b) A oportunidade de atender esa necesidade mediante a execución dos distintos proxecto xa citados, porque son axeitados para extraer resultados de interese en varios ámbitos produtivos que se poidan extrapolar ao conxunto de Galicia.

3.- Que existe converxencia de intereses entre as entidades asinantes en orde á consecución do obxecto referido, pois coinciden no interese común de formular un modelo de actuación que poida trasladarse a outras actuacións de natureza similar, e os resultados que deriven do convenio (información, documentos, estatísticas,...) serán de titularidade compartida das partes.





4.- Que o instrumento convencional que se pretende asinar fundaméntase no seguinte:

- a) A Axencia Galega de Desenvolvemento Rural ten asignadas as competencias previstas no artigo 3 do Decreto 79/2001, de 6 de abril, polo que se aproba o Regulamento da Agader, entre elas, promover e incentivar a cooperación entre os axentes públicos e privados cuxas actuacións incidan directa ou indirectamente no desenvolvemento das zonas rurais.

Por outra parte, o Banco de Terras de Galicia, instrumento xestionado pola Agader en virtude do disposto na Disposición Transitoria Segunda da Lei 6/2011, do 13 de outubro, de mobilidade de terras (en adiante, LMT), conta entre as súas funcións as de *“Prestar a terceiras persoas servizos que teñan como finalidade acadar a mobilización de predios con vocación agraria, baixo calquera negocio xurídico válido en dereito, e, en particular, servizos de arbitraje, promoción, dinamización, intermediación, xestión e aconsellamento técnico e xurídico para a formalización de contratos de cesión temporal ou de transmisión de predios con vocación agraria ou de instalacións agrícolas, gandeiras, forestais ou mixtas”*. (Artigo 9.1.e LMT). Para cumprir estes fins a Agader, a través do Banco de Terras de Galicia, está a desenvolver un conxunto de Proxectos de Mobilización de Terras Agrarias en situación de abandono, con carácter experimental, que teñen como obxectivo obter datos estatísticos, agronómicos, comerciais, económicos ou de calquera outro tipo que podan servir para a extensión deses proxectos ao conxunto do territorio, xa en forma regrada, unha vez levados a cabo os proxectos en diferentes sectores produtivos e áreas xeográficas.

- b) O Concello de Folgoso do Courel (en adiante, o Concello) ten un marcado carácter rural, como consecuencia da súa grande extensión territorial, superior aos 190 km², a súa conformación territorial en nove parroquias e corenta e seis pobos, con só unha poboación de arredor dos 1.100 habitantes. Estas condicións, unidas á súa caracterización orográfica e climática e ao seu carácter periférico con respecto aos núcleos de decisión administrativos, obriga a considerar o seu modo de desenvolvemento, ademais dos singulares valores ambientais, paisaxísticos e turísticos, na recuperación de actividades produtivas como a explotación dos soutos tradicionais, actualmente en estado próximo ao abandono, por mor das circunstancias demográficas, pero que contan cunha enorme tradición na calidade do produto.





- c) Os principais fins da Asociación “Agrupación de propietarios particulares Souto Rego da Brancha Moreda Concello Folgoso do Courel” son os seguintes:
- Limpeza, conservación, mellora, forestación e tratamentos silvícolas no monte, soutos, piñeirais, pradeiros, masas de frondosas autóctonas así como a conservación de tódolos elementos patrimoniais
 - Realización de tratamentos silvícolas e melloras medioambientais en parcelas das que son propietarios os membros da asociación.
 - O estudo e resolución dos problemas comúns dos agrupados, relacionados coa súa condición de propietarios particulares que habitan no medio rural e a vida social do territorio que asignan os estatutos.
 - Tomar medidas de prevención e defensa contra incendios forestais nos terreos comúns dos agrupados.
 - A promoción e desenvolvemento profesional e cultural dos agrupados.
 - Realizar, difundir e promocionar estudos, informes e demais documentación relevante relacionada co medio rural dende unha perspectiva de xénero.
 - Impulsar, potenciar e executar actuacións de diversa índole, encamiñadas a erradicar calquera forma de discriminación no medio rural, colocando a súa poboación en condicións de igualdade en todo tipo de ámbitos.
 - Desenvolver e promover actividades formativas de diversa índole encamiñadas a lograr unha maior preparación cultural e profesional
 - Difundir e promover a cultura e condicións de vida do mundo rural, sensibilizando e colaborando cos medios de comunicación para que fagan chegar unha imaxe real
 - Cantas outras actividades lícitas sexan de conveniencia dos intereses comúns dos agrupados. Actividades culturais, deportivas, medioambientais, rurais, mellora de infraestruturas, etc.

Todos estes fins directamente implicados no desenvolvemento rural do Concello e no mantemento digno de modos de vida derivados de actividades económicas tradicionais.

5.- Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.





6.- Que o presente convenio non xerará nin dará lugar a ningunha contraprestación económica entre as partes asinantes, se ben a Agader asumirá en 2018 actuacións sobre camiños e predios, mediante un encargo ao medio propio Tragsa financiado con 82.037,39 € da partida 13.04.712A.6404 (proxecto 2017-00004).

En atención ao exposto, e co fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela

O director xeral de Agader

(asinado electronicamente)

Miguel Ángel Pérez Dubois

